

Communicaziun allas medias digl cumegn da Surses e dalla Tourismus Savognin Bivio Albula SA (Nr. 09-2020)

Surses: Son Silvester sainza rachetas e petardas

La suprastanza communal supplitgescha la populaziun da Surses da renunztgier durant igls firos da lascher eir rachetas e dad anvidar petardas. Uscheia pon igls effects negativs per nateira, carstgangs ed animals neir redutgias considerablamaintg. Illuminaziuns belas ed impressiunontas ve da fatschedas da baselgias an Surses porschan la pussebladad da galdeir igls firos an veir senn digl pled.

La suprastanza communal ò decida da recumandar a giasts ed indigens da renunztgier da lascher eir rachetas e dad anvidar petardas da Son Silvester. Bliers animals da tgesa ed animals selvadis reageschan cun stress e tema sen la canera ed igls tgametgs nunusitos, caschunos digls fis artificialis sen la midada digl onn. Cunzont per animals selvadis pò chel snuevel spitachel da gleichs da mesanotg esser en prieveil acut. Caneras anetgas cun tshivladas e sfaragems da rachetas, petardas e colps da murters pon manar a reacziuns da panica tar igls animals. Igl sfaragem da son Silvester monta - principalmaintg er durant las notgs freidas d'anviern - en disturbis considerabel.

La suprastanza communal da Surses supplitgescha percheigl la populaziun ed igls giasts da suandar alla sia recumondaziun e da renunztgier da lascher eir rachetas e dad anvidar petardas. Tot sagond las cundiziuns climaticas sa resalva la suprastanza igl dretg da relascher en scumond general da fis artificialis pigl antier territori.

Cun chella renunztga a fis artificialis vot la suprastanza communal betg ruinar l'atmosfera da Son Silvester. Anzi, i duess neir fatg plaz ad ensatge nov. La Savognin Bivio Albula SA ed igl cumegn da Surses elaboreschon alternativis per saveir porscher agls giasts ed agls indigens en evenimaint segl li. Per exaimpel ins pò sa legrar digls 24-12-2020 anfignen igls 3 da schaner 2021 dallas baselgias illuminadas a Savognin (baselgia da Son Martegn) e dalla baselgia reformada a Beiva. Agls giasts vign fatg ultra da chegl ena sorpresa segl li. Durant igl taimp d'advent vignan ornos treis gronds pignouls da Nadal an Surses, tgi derasan uscheia l'atmosfera da Nadal.

Belas festas!

Infurmaziuns: Leo Thomann, mastral (e-mail: leo.thomann@surses.ch, tel. 079 405 9673)

Tinizong, igls 19-11-2020